

Blain men neim Batameiyas

[Methyu 20:29-34](#); [Luk 18:35-43](#)

Storimen: ⁴⁶Bambai na Jisas en im wekinmen olabat bin go thru langa Jeriko. Loda pipul bin deya garram olabat, en wen deibin kamat najasaid langa det taun, deibin luk wanbala men bin jidanbat deya, en imbin blainwan. Det blain men bin san blanga Tameiyas, en imbin neim Batameiyas, en imbin jidanbat deya wansaid langa det roud askimbat enibodi blanga mani.

⁴⁷Wal wen det blain men bin sabi Jisas bin wokwok pas deya, imbin stat jinginat na,

Blain men: Jisas! Grensang blanga Deibid! Yu sori langa mi!

Storimen: ⁴⁸Wal sambala pipul bin gitwail langa det blain men, en deibin dalim im blanga jidan kwait en nomo jingat. Bat imbin stil kipgon jinginatbat mowa adbala,

Blain men: Grensang blanga Deibid! Yu sori langa mi!

Storimen: ⁴⁹Wal wen Jisas bin irrim det blain men jingat, imbin stap, en imbin dalim detlot pipul blanga jingat langa im, en deibin jingat langa det blain men,

Detlot pipul: Yu gudbinji na, en yu gidap, dumaji im jinginat langa yu.

Storimen: ⁵⁰Wal det blain men bin tjakidawei det bleingkit blanga im, en imbin jampap, en imbin go langa Jisas, ⁵¹en Jisas bin askim im,

Jisas: "Wanim yu wandim mi garra dum blanga yu?"

Storimen: En det blain men bin tok,

Blain men: Titja, ai wandi luk.

Jisas: Yu gobek na, dumaji yubin bilib langa mi, en blanga tharran na yu gudbala na.

Storimen: Wal streidawei det blain men bin luk, en imbin bulurum Jisas langa det roud langa Jerusalem.